

Conoce Gobernador Fredis Refunjol

Skirbi pa: Danny van der Linden

Naci di un famia humilde a krese den bario di Savaneta. Savaneta cuna di hendenan humilde y orguyoso, cla pa defende nan principianan.

Savaneteronan, orguyoso di e bario y sigur di e caracter di nan pueblo.

Mas orguyoso Savaneta por ta cu despues di a logra ministronan den pasado, awe tin un yiu cu ta Gobernador. Freddy semper a keda cu e amor pa su bario y a demostra esaki tambe. Freddy



tabata un gran hungado di volley pa Rapid club, tambe den softball Freddy tabata sa di destaca. Su amor pa deporte a haci cu constantemente e tabata serca su pueblo na unda e tabata duna oido na e inquietud cu tabata reina den nos comunidad.

Ora cu menciona Savaneta automaticamente tur hende ta pensa ariba Freddy. Un homber intrego cu un reputacion intachable. Danki na e imagen cu semper pueblo tabata y ainda tin di su persona, cu awe nos por aprecie den e funcion di Gobernador di Aruba. Freddy a sa di gana e respet di Aruba den su totalidad. Un politico cu a cuminsa su carera cu e mesun senciyes cu e a hiba su bida, pero semper a desea di aporta na su pais, na su pueblo, na su comunidad y na su hobennan.

Esaki a motiva Freddy pa bira un educador, cu lo permitie di duna guia na e hobennan y asina forma lidernan di mañan. Freddy semper tabata un ehempel pa tur cu a conose, apesar di hopi cu a purba di dañá su reputacion y mancha su nomber. Politicamente Freddy a haya hopi critica, pasobra segun otronan e lo no a haci mucho pa nos pais. Nada ta menos berdad. Freddy su logronan ta grandi, mucho mas di locual hopi ta kere, pero no ta aspectonan cu bo ta mira directamente. E efecto nos lo ripara despues di tempo.

Freddy semper a lucha pa mehora e systema di enseñansa pa esina duna un calidad halto di educacion na nos yiunan, algo cu ta indispensable na un pais desaroya. Freddy igual cu nos Libertador Betico Croes d.f.m. ta un educador. Y aki Freddy su gran logronan ta sinta. Pasobra: "Un pais sin educacion ta un pais sin rumbo". Na diferente ocasion Freddy tabata sa di logra sea renoba o construi edificionan nobo cu ta conforme e exigencianan cu desaroyo ta trece cune. Freddy a pone pa diferente proyecto di construccion e prome piedra pa duna inicio na un edificio cu lo keda para pa semper! Mescos cu nos admiracion y aprecio pa Freddy lo keda pa semper.